

# Valladas grischunas tschertgan lur potenzial

La Terra Grischuna analysescha, commentescha e preschenta la situaziun

■ (anr/gc) En il chantun da las 150 valladas, pia en il Grischun, è – era segund la novissima Terra Grischuna (I/2015) – blier en moviment e midada. Las differenzas sajan grondas – sco i sa mussia per sumeglia tranter la Vallada renana da Cuira cun sia ferma economia e vals periferas, confruntadas cun svilups negativs e da depopulaziun. Il grond potenzial è vegnì mess sin il turissem che va dentant enavos ils davos onns. En l'agricultura vegnan blers manaschis dads si u mess ensemen e plazs da lavur svaneschan. L'industria concentrescha – pervì da la dependenza da l'export – sin insaquants lieus centralis. Daventa la terra nuncultivada, l'uschenumnada «alpine Brache», ina realitad? Quai che la Terra Grischuna mussa n'è davairas betg en tuts resguards positiv. Ma las consideraziuns e conclusiuns constattan.

## Confruntà cun bleras midadas

En la contribuziun «Il Grischun è multifar» vegnan vitgs, valladas e l'economia inventarisads e perspectives enumeradas. Ils davos onns è il potenzial economic vegnì discutà intensiv. Era sin plaun federal han ins sias visiuns. Mo star vid la realitad è bain il meglier.

## Quant grond è il retgav d'in parc?

Dals parcs natirals e naziunals profitechan mintgacas natira e cuntrada. Vala quai dentant era era per l'economia en las vals? Ins è a la tschertga dal retgav tras propostas, studis ed experientschas praticas.

Il Grischun è confruntà cun ina gronda sfida demografica. Quai vegn a s'effettuar sin la represchentanza politica da las vals, era sch'i n'è il mument anc betg in tema.



Frontispizi da la nova Terra Grischun. MAD

## Co i vesa or en Surselva

La Surselva vegn preschentada sco «Ina vallada tranter stagnaziun ed innovaziun», mussà a basa da fatgs. Ins sa dumonta concretamain sche la digren da la populaziun possia in summa vegnir franada. Mo i dat qua era fatgs positivs da remartgar.

En ina gronda part dal chantun Grischun èsi da constatar ch'il dumber da manaschis agricols sa reducescha. L'infrastructura da las vischnancas è dentant dependenta ch'i giaja bain cun l'agricultura. Ma tge alur, sche quella sa mida vinavant sco fin uss?

Samignun è in vitg tranter capricorn ed evla, essend che quella Val s'auda tant tar l'Engiadina sco il Tirolo. Enconuscha quella Val per la gronda offerta turistica. Qua s'uneschan cuntrasts sco izolaziun, avertadad anovers, natira, commerzi, agricultura e turissem.

## Discurri cun l'antierur avat da Mustér

«Jau stoss savair co i va.» Sut quel citat vegn relatà d'in inscunter cun l'avat emerità da Mustér Daniel Schönbächler. El saja sa retratg suenter dudesch onns

e surdà l'uffizi a forzas pli giuvinas. L'antierur avat discurra fitg avertamain – sco igl è tipic per el – da sia vita persunala e monastica. La Terra Grischuna dat onn per onn in premi. Dals trais proponids 2014 ha ella preferì e distinguì Dora Lardelli, Vicosoprano, per sia lunga lavur culturala.

## Nova rubrica

Cun la rubrica «Dus vitgs – in num» – lantschescha la Terra Grischuna ina nova seria da purtretts da vitgs, dad A fin Z, cun lur istorgia, atgnadads e persunalitads. Entschavì è vegnì cun «Alvagni-vitg ed Alvagni-bogn».

## En nova cumparsa

La Terra Grischuna ha survegnì – suenter dudesch onns – ina nova cumparsa, in auter vestgi. Persuenter ha la revista cun ina tradiziun da 70 onns tschernì ina via media. Ella vul restar ina vusch per la natira, cultura e temp liber – e medemamain cuntanscher dapli in public giuven. Ins ha perquai surlavurà moderatamain il layout uschia che las rubricas tradiziunals: Tema, gassetta e magazin sa preschentan pli cleramain, dend vinavant gronda paisa a l'illustraziun. Per che la Terra Grischuna saja pli levamain legibla han ins era midà la scrittira (tipologia) e la qualitat dal palpieri.

L'intent da quella novaziun è era d'augmentar il plaschair tar adina pli blers da leger la Terra Grischuna ch'è davairas bainfatga ed adina buna reclama per noss chantun.